

司馬府志

蘇子知

PDG

西安府志卷第七十四

拾遺志

地理

山水

建置

食貨

學校

史家之體類聚羣分然稗官野錄爲職要者所不及詳略
依前卷門類彙爲拾遺以妨簡漏其中閒有謾聞怪說可
喜可愕者亦必博採以資談助而佐記珠蓋子虛亡是洞
冥搜神猶古西京之遺意也然擇言尤雅至鄙褻之詞有
傷風教以及卮言謾語無關故實者又不勝其載也雖係
茲土概不闌入凡七卷

春秋元命苞東井鬼星散爲雍州分爲秦國得東井深動
之萌其氣險也

已下地理
山水拾遺

帝王世紀自井十六度至柳八度曰鶉首之次于辰在未

謂之叶洽于律爲蕤賓斗建在午今秦分野

廣雅北斗樞爲雍州

宋天文志三台六星中台上星主梁雍又天市垣二十二星在氏房心尾箕斗內西番十一星六曰秦

天官書秦之強也候在太白占于狼弧

淮南子庚秦午秦

魏崔浩傳庚之與未皆主於秦

歷象考成各省節氣時刻以京師爲主視各省東西之偏

度加減之

每一度當四分

陝西偏西七度三十三分四十秒減三

十分一十五秒

易通卦驗周雲如輪秦雲如行人

晉天文志渭水氣如狼白尾

侯鯖錄關東語云人聞長安樂出門西向笑

珍珠船天寶中承平歲久自開遠門至蕃界一萬二千里
居人滿野桑麻如織哥舒翰鎮青海遣使乘白駱駝奏事
日馳五百里

江鄰幾雜志趙龍圖師民來自耀州說其地昔名祓祠疑
祓祠亦是一兵器其秦鑄兵之所乎

關中記終南太乙左右三十里名福地

西陽雜俎有人遊終南一乳洞深數里乳滴瀝成飛仙狀
睂目衣服形製精巧有一未全其人因手承漱之經年再
往其像已成當手承處衣缺三寸不就

漫笑錄蘇子瞻任鳳翔府判官章子厚爲商州令二人同遊南山抵仙遊潭下臨絕壁橫木架橋子厚推子瞻過橋書壁子瞻不敢子厚平步以過用索繫樹躡之上下神色不動以漆墨濡筆大書石壁曰章惇蘇軾來遊子瞻拊其背曰子厚必能殺人曰何也子瞻曰能自拚命者能殺人書蕉盤屋有玉女洞飛泉甘冽蘇子瞻過此汲兩瓶去恐後復取爲從者所紿乃破竹作券使寺僧藏之以爲往來之信戲曰調水符

老學庵筆記東蒙終南峰名杜詩云故人昔隱東蒙峰又云故人今居子午谷皆長安地种明逸東蒙新居詩亦云登遍終南峰東蒙最孤秀南士注杜詩者妄引顓臾以爲

魯地

遊城南記自炭谷口行十餘里磴道之半有司馬溫公隸書二十八字曰登山有道徐行則不困擇平穩之地而置足則不跌人莫不知之鮮能愼

水經注渭水過長安縣北又東南逕兩石人北秦始皇造橋鐵鑊重不勝故刻石作力士孟賁等像以祭之鑊乃可移動

芝田錄李德裕任中書常飲常州惠山井泉自毗至京置鋪遞有僧曰京都一眼井與惠山寺泉脉相通在昊天觀後德裕乃以惠山一甕昊天一甕雜以八瓶暗記出處僧因啜嘗惠山與昊天者餘八同味德裕奇之當時停其遞

運

西陽雜俎景公寺前街舊有巨井俗呼八角井元和初有公主夏中過見百姓方汲令從婢以銀棱椀就井承水誤墜椀經月餘出於渭河

天祿識餘長安城南爲南斗形北爲北斗形故號斗城何遜咸陽詩云城斗疑連漢老杜秦城近斗杓秦城依北斗皆用此

已下建
置拾遺

水經注渭水石柱橋舊有忖畱神像此神嘗與魯班語班令其出忖畱曰我貌狼醜卿善圖物容我不能出班曰出頭見我忖畱乃出首班於是以腳畫地忖畱覺之便還沒水故置其像於水唯背以上立水上

兩京記西市隋曰利人市京西北隅有海池長安中僧法成所穿分永安渠水注之爲放生所穿池得石銘云百年爲市而後爲池自置立市至是時百餘年矣

六帖開元二十九年命觀風使鄭審檢校兩京驛門卽今門置十二辰候自審始也

周書韋孝寬爲雍州刺史先是路側一里置一土堠經兩頽毀每須修之孝寬乃勅部內當堠處植槐木代之旣免修復行旅又得庇蔭

開天遺事長安自昭應縣至都門官道左右村店民當大路市酒量錢數多少飲之亦有奸施者與行人解乏號爲歇馬杯

古今注蒙恬始作秦筆枯木爲管鹿毛爲柱羊毛爲被所

謂蒼毫也

已下食貨
物產拾遺

冊府元龜光武在長安時與宋佑共買蜜合藥帝追念之
賜佑蜜數顧問何如在長安共買蜜乎

唐闕史藍田歲貢冰常在冬杪如藍水不冰則主吏宣命
以祭一夕而成

過庭錄邵伯恭侍郎守長安旣去以書抵親識曰自去長
安惟酥梨筍時復在念

黃圖元始四年起明堂辟雍爲博士舍三十區爲會市列
槐樹數百行諸生朔望會此市各持其郡所出貨物及經

書傳記相與買賣論議樹下侃侃閭閻

已下學校
風俗拾遺

雍錄漢書孟喜舉孝廉爲曲臺直長注師古曰曲臺殿名
又孟卿傳注殿在未央宮又漢書行射禮於曲臺晉灼曰
天子射宮西京無太學於此行禮長安志於曲臺凡三出
一在未央一列三雍之次一雜叙在宮館之數以予考之
止未央有此臺志悞分爲三也

姚興載記姚興托意佛道公卿以下莫不欽附沙門自遠
而至者五千餘人起浮圖於永貴里立波若臺於中宮沙
門坐禪者恒有千數州郡化之事佛者十室而九矣

程子遺書子厚言關中學者用禮漸成俗正叔言自是關
中人剛勁敢爲子厚言亦是自家規矩寬大

陸游緒訓子孫才分有限無如之何然不可不使讀書貧

則教訓童稚以給衣食但書種不絕足矣能布衣草履以
事農圃足跡不至城市大是佳事關中村落有魏鄭公莊
諸孫皆爲農張浮休過之云兒曹不識字耕鑿魏公莊仕
宦不可常不仕則農可無憾也但切不可迫於衣食爲市
井小人

珍珠船天下有九福秦隴鞍馬福

西京雜記京城街道有執金吾曉暝傳呼以禁夜行惟正
月十五夜敕許弛禁前後各一日謂之放夜

開天遺事開元二十三年正月御五鳳樓錫宴命三百里
內刺史縣令帥所部音樂集於樓下各較勝負

開天遺事都中正月十五日造麴餌以官位帖子卜官位

高下或賭筵宴以爲戲笑

開天遺事都人士女正月半後各乘車馬供帳於園圃或郊野中爲探春之宴

天祿識餘秦俗二月二日携鼓樂郊外朝往暮回謂之迎富

秦中歲時記二月二日曲江拾菜士民極盛又唐上巳日賜宴曲江都人於江頭禊飲踐踏青草曰踏青

秦中歲時記寒食節內僕司車與諸軍使爲繩橛之戲合車轍道兩頭張繩高二尺許駕車盤轉碾輪於繩上過不失者勝落輪繩下者輸賭物動以千計

松窗雜記曲江池都人遊賞盛於中和上巳節卽錫宴臣

僚會於山亭賜太常教坊樂池備綵舟惟宰相三使北省
官翰林學士預焉

曲江春遊錄曲江大會先牒教坊請奏上御紫雲樓垂簾
觀焉時或擬作樂則爲之移日勅下後人置皮袋例以圍
障酒器錢帛入其中逢花卽飲

曲江春宴錄曲江貴家遊賞則剪百花裝成師子互相送
遺師有小連環欲送則以蜀錦流蘇牽之唱曰春光且莫
去畱與醉人看

曲江春宴錄霍定與友生遊曲江以千金求人竊貴侯亭
樹中蘭花挿帽兼自持往綺羅叢中賣之

景龍文館記唐中宗四年上巳祓禊於渭濱賦七言詩賜

細柳園

清異錄唐世京城遊手夏月採蟬貨之曰青林樂買者籠
窻戶閒驗其聲長短爲勝負謂之仙蟲社

秦中歲時記端午前二日東市謂之扇市車馬闐集
開天遺事唐宮中端午造粉團角黍貯盤中以小角弓射
之中者得食

秦本紀注德公二年初伏以狗禦蠱

西京雜記漢彩女常以七月七日穿七孔針於開襟樓
輦下歲時記七夕以蠟作嬰兒形浮水中爲婦人宜子之
祥謂之化生

六帖德宗九月詔羣臣宴曲江自爲詩敕宰相擇文人賡

和帝自第之以劉太真李紆等爲上鮑防于邵等次之張滿等爲下與擇者四十一人

唐書韋綬爲集賢院學士九月九日宴羣臣曲江綬請集賢院學士得別一會帝從之

秦本紀注惠文君十二年初臘正義十二月臘日也秦惠文王始爲之獵禽獸以歲終祭先祖也

秦中歲時紀秦中歲除日儼作鬼神狀二老人各爲儼翁儼母

甲子諺春雨甲子赤地千里夏雨甲子操舟入市秋雨甲

子禾頭生耳冬雨甲子雪壓羊豕

甲子諺四時不取甲子雨

術諺壬子癸丑甲寅晴五旬之中宵見星又戊午至甲子
七日行泥滓

李因篤集雲諺雲之西雨湧泉雲之南水傾蟬雲之東佇
立空雲迤北耕獲得又朝雲謠朝雨雖雨不雨老健春寒
秋暑又雲謠橫雲不雨縱雲雨願爲東風吹送汝又星諺
星瞬目雨浸屋又畢星諺大瓶注小瓶溢爲雲水聲其下
如建瓴又元宵諺風吹十五月雨灑清明節又六月六日
諺六月六日雨菜根遭蟲蛙又中秋諺八月十五雲遮月
來年元宵燈燒雪

南部新書長安風俗元日以後遞飲食相邀號傳座
輦下歲時記長安每歲諸陵以寒食薦餽粥雞毬等又薦

雷子車至清明尚食內園官小兒於殿前鑽火先得火者
進上賜絹三尺金碗一口都人並在延興門看內人出城
灑掃新進士則於月燈閣置打毬之宴賜宰臣以下醪醑
酒

開天遺事長安春時盛於遊賞園林樹木無閒地學士蘇
頲應制云飛埃結紅霧遊蓋飄清雲帝覽之加賞

開天遺事長安士女遊春野步遇名花則必設席藉草以
紅裙遞相插掛以爲宴幄

秦中歲時記長安四月已後自堂廚至百司廚謂之櫻筍
廚公餽之盛常日不同

開天遺事唐宮中秋時妃妾以金籠閉蟋蟀寘枕函畔夜